

24257/p

ORDINIS MEDICI  
IN VNIVERSITATE LIPSIENSI

H. T.

PROCANCELLARIVS  
D. IOANNES CAROLVS GEHLER

ANAT. ET CHIRVRG. PROF. PVBL. ORD. FACVLT. MEDIC.

ASSESSOR COLL. MIN. PRINC. H. T. PRAEPOS. CIVIT.

LIPS. MED. OBSTETR. CET.

PANEGYRIN MEDICAM

AD D. XXXI. AVG. CXCCLXXI.

INDICIT

QVATENVS AER IN PVLMONES HAVSTVS  
VITAM ALAT

DISQVIRENS.







**A**ëris liberioris vsum ad vitam plerorumque, ne dicam omnium; animantium conseruandam et sustentandam maxime atque adeo esse necessarium, vt carere eo absque insigni detrimento ne per tantillam temporis spatium possint, nemo in dubium vocabit. Quod licet quotidiana experientia luculenter commonstret, exprimentaque physicorum, demto sub antlia pneumatica aeris afflatu, vitam animantium mox extinguui, satis abunde comprobent: nondum tamen liquet certoque definiri potest, qua ratione id fiat, et vnde haec aëris ad alendam vitam necessitas commode ac vere deriuari queat. Hinc maximus fuit ab omni aeuo inter celebres physiologos dissensus; summaque opinionum diuersitas, quando, quid aër in animali corpore praestet, exponendum ipsis declarandumque erat. Licet vero variae sint viae, per quas ingredi animantium corpora solet aër, eorumque humoribus admisceri, cum vel per





cutis poros sorbeatur; vel iis rebus, quibus ad nutriendum corpus utimur, immixtus chylo sanguinique adfundatur; vel a pulmonibus haustus internis sedibus adplicetur, et ad reficiendam vitam conferat: tamen missis prioribus nunc tantum de ultima hac via disputabimus breuiter, et videbimus, annon ex iis, quae recentiorum physicorum solertia de aëris vera indole ac natura detexit, huc usque inter physiologos agitata lis possit componi atque verus aëris inspirati usus rite definiri. Non quidem attinet, fusius hic recensere omnes ac singulas physiologorum opiniones de ea, quam praestet a pulmonibus haustus aer machinae corporis utilitate, sed breuiter tantum earum praecipuas addidisse sufficiat. Alii aerem per poros pulmonum patulos ipsi sanguini admisceri atque humoribus infundi, alii a frigidiori aura hausta sanguinem a corde venientem, nimis calidum, refrigerari; alii resolutum sanguinem aeris accessu densari; alii eum contritis globulis maioribus attenuari; alii a pulmonibus per aerem haustum repletis atque diductis sanguinem intimius misceri docuerunt, ut alias aliorum hypotheses taceam, quas plerique ex cognitis tunc aeris proprietatibus physicis, fluiditate, elatere ac pondere declarare et explicare annitebantur. Sunt praeter hos multi, qui priscae aevi auctoribus assensum praebent, sibi que persuadent, inesse aeri principium quoddam ad vitam sustentandam aptum; hinc aerem *vitae pabulum*, *occultum vitae cibum* dicunt aliisque nominibus appellant, eumque stimulum nervis addere existimant. Ex quorum numero ipsum BOERHAAVIUM nominabo, qui asserit, esse in aere virtutem penitus singularem, licet quid illud sit, quod hanc virtutem efficiat, et quomodo agat, se prorsus nescire aperte simul fateatur. Fuisse iam a primis medicae artis statoribus eam doctrinam diuulgatam, nuper demum egregie ac docte PLATNERVS in Palaeophysiologia monstravit

colle-



collectis plurimis ex eorum scriptis locis, vbi hanc suam mentem abunde declarauerunt. Poterunt vero, adeo inter se discrepantes de aeris inspirati vsu scriptores commode in duas classes diuidi: quarum vna eos comprehendit, qui ipsas aërei elementi particulas, siue crassiores eius substantiam, siue subtiliorem quandam eius tantum partem, vario nomine appellatam, nutrire, ad HIPPOCRATIS mentem, nostrum corpus, certe illud reficere posse existimant; alteram classem constituunt ii, qui haustum in pulmones aerem, solvere ibidem noxias quasdam particulas, quas eicere e corpore annititur prouida natura, easque sibi vnitas e corpore eliminare asserunt. Ad hanc quidem classem recentiorum plerique erunt annumerandi, qui ex institutis a CEL. PRIESTLEYO experimentis nouam hanc, certe haëtenus non satis pensitatam, aeris vim, varia corporum genera soluendi, didicerunt. Saepius quidem miratus fui, quid sit, quod ipse BOERHAAVIUS, sagacissimus ille naturae scrutator, hanc aeris virtutem, insitam ipsi a natura, quam cum omnibus aliis fluidis communem habet, prorsus neglexerit; quæ aequæ ac alia chemica menstrua corporum solutiones perficere, partes, e nexu ac cohaesione sua turbatas, recipere ac cum iis combinatus, nouam mixti formam ostendere valet. Licet enim in variis locis ille asseruerit, *aerem habendum esse verum omnium verum permistarum chaos*: apertum tamen est, eum ibi de aere communi seu illo quem atmosphaeram dicere solemus, loqui, cum, quæ in aere contineantur varia sane esse et incredibiliter multiplicia, sed et in variis plagis penitus diuersa affirmer, hæcque omnis ferme generis corpuscula simul confusa aggregatum diuersissimis constans rebus constituere asserat.

Quæ vero de aeris per pulmones hausti vsu suscipitur disputatio, ea explicet necesse est ipsius aeris purioris, qui elementum corporum constituit, naturam ac indolem,





non istam atmosphaericam auram, quae orbi nostro circumfusa, ob commixtas omnis generis quisquiliis, multum ab elementari puro aere differt. Quae licet inspiretur continuo, omnis tamen, quam vitae praestat, utilitas ab aeris purioris seu elementaris parte, quam in se continet, erit expectanda. In quo quidem omnino peccasse mihi videntur fere omnes, qui hucusque de argumento hoc differuerunt; cum, quae ab hac aeris atmosphaerici miscela orire in respiratione phaenomena atque effectus viderint, saepius ab ipso aere, non ab adhaerentibus ipsi particulis fieri sibi et aliis persuadeant. Et si qui etiam sunt, qui aeris elementum ab atmosphaerico aere distinxerint, ad physicas eius proprietates magis, in virtute sua declaranda respexisse eos videmus, cum, quas aeri esse chemicas qualitates recentiorum physicorum solers industria detexit, aut plane ignorarent, aut certe nimis negligerent. Sunt quidem et inter recentiores nonnulli, qui aerem ex elementorum numero prorsus eximendum esse autument, auramque atmosphaericam ab atomis diuersissimae naturae a corporibus detritis componi sibi fingant. Quibus tamen assentiendum esse vel ex hoc negare vellem, quod semper adsit necesse est fluidum quoddam in quo obuolitantes hae detritae a variis corporibus particulae suspensae natant, aut solutae contineri queant. Quod nimirum in aqua fieri videmus, id idem de aere, aequo fluido elemento, valebit. Quemadmodum enim nullibi puram et elementarem aquam inuenire possumus, cum omnis, quam vel ex atmosphaera colligere, vel ex fluminibus, fontibus, puteis desumere ac haurire velles, valde conspurcata salinis, metallicis aliisque solubilibus particulis esse soleat; sic et nullibi forsan aer adeo purus habebitur, ut ad elementarem suam naturam proxime accedat. Neque tamen ob hanc aquarum impuritatem audebit quis facile negare, esse aquam verum  
elemen-



elementum primum, quod ad quorumvis fere corporum compositionem a natura impenditur. Nascitur ex hac variarum particularum admixtione, qua mirum in modum inquinari aer, nos ambiens, solet, summa ista eius diversitas, quae impulit recentiores physicos, ut tot tamque varia aeris genera distinguant, haecque suis nominibus insigniant, quorum omnium nuper LEONHARDI succinctam at egregiam historiam proposuit. Quae cuncta licet facile concesserim maximopere a se inuicem differre, nollem tamen quemvis e corporibus varia ratione expulsum vaporem, seu aeriformem substantiam, quamvis habeat quasdam proprietates cum aere communes, aeris nomine appellare, nisi certe solutus ille ab aeris fluido elemento fuerit. Possunt tamen hae partes aeri adhaerentes, siue inflammabiles istae, siue salinae siue alius indolis fuerint, facile rursus ex hoc connubio solui, et ex aere, in quo solutae erant, praecipitari. Docent enim celebres viri, in hac aeris disquisitione occupati, posse omnino vnum aeris genus non solum in alterum commutari, sed et quolibet has aeris species, separatis, quae cuilibet earum adhaerebant, inquinamenti, suppeditare vnum idemque aeris genus, semper sibi simile, purissimi aeris titulum optime promerens, certe eius speciem omnino prae se ferens. Solent hoc *dephlogisticatum aerem* plurimi dicere; cuius summam ad phlogiston affinitatem esse ex suis didicerunt experimentis, quae tanta utique est, ut illud difficillime possit ab eo prorsus liberari. Sed fac etiam, illum aerem ad eam, quae ipsi a natura concessa est, puritatem nondum esse euectum; erit tamen ad cognoscendam aeris elementaris indolem, omnibus ceteris generibus multo aptior, ut inde pro elemento, certe chemico, eum habere commodè queamus. Esse huic dephlogistico aeri, ob suam maiorem puritatem, maiorem quoque vim soluendi eas corporum particulas, quas sua

natur-





natura in se recipere potest, vel ex hoc vno commonstrari potest, quod accensae candelae flamma multo viuidior appareat citiusque candela comburendo consumatur in tali aere, quam quidem in atmosphaerico, in quo breui, nisi renouatus ille fuerit, extinguitur. Hunc purum vero aerem respirare nobis non concessit diuina sapientia, sed ob varias causas, alia occasione data a nobis recensendas, hoc respirandum fluidum admixtis aliis diuersi generis particulis contemperauit, vsuique vario aptum reddidit. Licet enim quaeuis, quae nos ambit quamque spiramus continuo, atmosphaerica aura habeat in se quandam purissimi elementi aerei partem, est tamen ea heterogeneis multarum rerum effluuiis ac exhalationibus valde conspurcata adeoque diuersa, vt nullibi sibi similis sit, et quaeuis fere eius portio, vna vice hausta, ab ista, quam subsequens inspiratio pulmonibus infundit, mirum in modum, miscelam eius si spectaueris, differre videatur. Etsi nonnulli, in qua ratione purus aer atmosphaerae admixtus sit, computo facto definire conati sunt, existimaruntque, vnam dephlogisticati aeris partem cum aeris phlogisticati, cui exigua fixi aeris copia adhaeret, tribus fere partibus commixtam, atmosphaerici aeris mixtionem efficere: quilibet tamen, vel me non monente, perspiciet, ob innumeras alias, pro locorum differentia diuersissimas, particulas, quae in atmosphaera vel tantum obuolitant, vel solutae ab ea eius mixtionem constituunt, adeo ipsam omnino variare, vt ex hac multiplici admixtione proprietates eius, et ab his expectandi effectus aequae vehementer discrepent. Qui quidem varii effectus et in respiratione euidenter sese manifestant, quanquam, vt supra dictum est, maxima atmosphaerici aeris inspirati utilitas ab eius purioris aeris parte sola proficisci mihi videatur. Hunc vero atmosphaericum aerem in pulmones haustum adeo corrumpi, vt sensim re-  
spira-